

## Կ Ա Ր Ծ Ի Ք

**Ամայա Գագիկի Սաֆարյանի «Հավաքների ազատության սահմանադրական հիմքերի իրացման արդի հարցադրումները» ԺԲ.00.02 «Հանրային իրավունք (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում)» մասնագիտությամբ թեկնածուական ատենախոսության վերաբերյալ**

Ամայա Գագիկի Սաֆարյանի «Հավաքների ազատության սահմանադրական հիմքերի իրացման արդի հարցադրումները» վերտառությամբ թեկնածուական ատենախոսությունը նվիրված է հավաքների ազատության էության, սոցիալական և իրավաքաղաքական նշանակության բացահայտմանը, հավաքների առանձին տեսակների անհրաժեշտության վերլուծությանը, հավաքների ազատության իրավունքի իրացման, ինչպես նաև դրա սահմանափակման սահմանադրաիրավական հիմնխանդիրներին: Հեղինակն աշխատանքի առանձին գլխում հավաքների ազատության իրավունքի արդյունավետ իրացման համատեքստում քննարկել է նաև այդ իրավունքի իրացման հարցում իրավական մշակույթի դերը:

Հայաստանի Հանրապետությունում հավաքների ազատության իրացման ոլորտի հասարակական հարաբերությունների ներկայիս զարգացումների համատեքստում հեղինակի կողմից քննարկված և վերլուծության ենթարկված հիմնախնդիրները չափազանց արդիական են և ունեն գիտագործնական հետազոտության մեծ պահանջարկ: Հիմնավոր են հեղինակի՝ թեմայի արդիականությանը և խնդրո առարկա հարցադրումների հրատապությանը վերաբերող փաստարկները:

Հայաստանի Հանրապետության սահմանադրական զարգացման ողջ ընթացքում թե՛ իրավական կարգավորման, թե՛ գործնական հարթություններում առկա են եղել լուրջ խնդիրներ հավաքների ազատության իրավունքի արդյունավետ կարգավորման և իրացման ոլորտում: Հեղինակի առաջ քաշած հարցադրումների՝ տեսական վերլուծության

վրա հիմնված ամբողջական և համակարգային պատասխանները կօգնեն լուծելու այս ոլորտում առկա մի շարք խնդիրներ:

Հեղինակին հաջողվել է քննարկվող հիմնահարցերի վերաբերյալ ներկայացնել ինքնուրույն, հիմնավորված դատողություններ, գիտականորեն հիմնավորված հետևություններ, ինչպես նաև ՀՀ իրավական համակարգում ներառված մի շարք նորմատիվ իրավական ակտերի և (կամ) դրանց առանձին դրույթների կատարելագործման կապակցությամբ օբյեկտիվորեն արդարացված և անհրաժեշտ գործնական առաջարկություններ:

Ատենախոսությունում ներկայացված դատողություններն ու եզրահանգումներն ունեն գիտագործնական զգալի նշանակություն և կարող են օգտակար լինել ինչպես առանձին հետազոտությունների, այնպես էլ հայրենական օրենսդրության բարեփոխման համար:

Ամալյա Գագիկի Սաֆարյանի թեկնածուական ատենախոսությունն ունի տրամաբանական կառուցվածք. այն կազմված է ներածությունից, երեք գլխից, յոթ պարագրաֆից, եզրակացությունից, հավելվածներից, ինչպես նաև օգտագործված գրականության ցանկից:

Աշխատանքի առաջին գլխում հեղինակն անդրադարձել է հավաքների ազատության տեսաիրավական հիմքերին, բացահայտել է դրանց սոցիալական և իրավաքաղաքական նշանակությունը, ինչպես նաև վերլուծել է հավաքների առանձին տեսակների անհրաժեշտությունը և իրավական հիմքերը:

Աշխատանքի երկրորդ գլխում հեղինակն անդրադարձել է հավաքների ազատության իրացման սահմանադրաիրավական հիմնախնդիրներին, մասնավորապես՝ այդ ազատության իրացման կառուցակարգերին և դրա սահմանափակման հիմքերին և սահմաններին:

Աշխատանքի երրորդ գլխում հեղինակն անդրադարձել է հավաքների ազատության իրավունքի ապահովման գործընթացքում ոստիկանության դերին և քննարկել է հավաքների ազատության իրավունքի արդյունավետ իրացման համատեքստում իրավական մշակույթին առնչվող հիմնախնդիրները:

Որպես աշխատանքի ձեռքբերում կարելի է համարել նաև հետևյալ իրողությունները.

- Աշխատանքը շարադրված է պարզ և ընկալելի լեզվով, ինչը վկայում է քննարկվող հիմնախնդիրներին լիարժեք իրազեկվածության, թեմայի վերաբերյալ սեփական դատողությունները մատչելի շարադրելու հեղինակի կարողության մասին:

- Աշխատանքի պաշտպանության ներկայացվող դրույթներում հեղինակը գերծ է մնացել զուտ միայն իրավակարգավորման կատարելագործման առաջարկություններ ներկայացնելուց և աշխատանքի այդ հատվածում ներառել է այն տեսական ընդհանրացումները, որոնք ապագայում կարող են հիմք հանդիսանալ կոնկրետ իրավական կարգավորման նախագծեր մշակելիս: Աշխատանքում պաշտպանության ներկայացվող դրույթները հստակ տարանջատված են եզրակացություններից: Նման պայմաններում հեղինակը գերծ է մնացել աշխատանքի այս երկու հատվածների անհարկի կրկնությունից:

**Ընդհանուր առմամբ դրական գնահատելով ատենախոսությունը՝ դրա առնչությամբ, այնուամենայնիվ, նպատակահարմար ենք գտնում ներկայացնել հետևյալ դիտողությունները.**

1) Գիտական նորույթի տեսանկյունից վիճահարույց է պաշտպանության ներկայացվող առաջին դրույթը, որը ձևակերպված է բարդ շարադրանքով: Չթերագնահատելով հեղինակի կողմից իրականացված հետազոտության արժեքը, այնուամենայնիվ, կարծում ենք, որ հեղինակի կողմից այդ դրույթի բովանդակության որոշակիորեն պարզեցված ներկայացնելը հնարավորություն կտա առավել ընկալելի դարձնել այն:

2) Պաշտպանության ներկայացվող երկրորդ դրույթով հեղինակն առաջարկում է հանրային հավաքի անցկացման մասին իրազեկման քննարկումների ընթացքում ուստիկանության և ազգային անվտանգության մարմիններին չսահմանափակել միայն իրազեկման մեջ արտացոլված հնարավոր վտանգների կամ առնվազն խոչընդոտների

շրջանակով, այլ վերջիններիս համար սահմանել պարտականություն հավուր պատշաճի բացահայտելու դրանց իրական շրջանակները և ողջամտության սահմաններում հրապարակայնացնելու բացասական դիրքորոշման իրենց հիմնավորումները: Մեր կարծիքով այս դրույթը, արժեքավոր լինելու հետ մեկտեղ, կարիք ուներ առավել մանրամասն անդրադարձի աշխատանքի բուն տեքստում, մասնավորապես՝ բացասական դիրքորոշման հիմնավորումները հրապարակայնացնելու «ողջամտության սահմանների» բացահայտման առումով:

3) Հստակության տեսանկյունից վիճահարույց է պաշտպանության ներկայացվող վեցերորդ դրույթը, որով հեղինակն առաջարկում է *հավաքների ազատության իրավունքի արդյունավետության ապահովման տեսանկյունից քաղաքական չեզոքության ցուցաբերման և առանց համազգեստի հավաքների մասնակցելու հետ կապված իրավական անորոշության խնդիրը լուծել համարժեք ու համալիր իրավական կարգավորումների միջոցով՝ երաշխավորելով հանրային ծառայության սահմանափակումների և անձի քաղաքական իրավունքների խելամիտ ներդաշնակեցման հիմնախնդիրը*: Մեր կարծիքով, նշված խնդիրը լուծելու համատեքստում հեղինակի կողմից ներկայացված իրավական կարգավորումները աշխատանքի բուն տեքստում լրացուցիչ հիմնավորման կարիք ունեին:

Այնուամենայնիվ՝ ներկայացված դիտողությունները հիմնականում կրում են բանավիճային բնույթ և չեն նվազեցնում հետազոտության գիտական արժեքը:

Ամփոփելով վերոշարադրյալը՝ պետք է փաստել, որ գրախոսվող ատենախոսությունը պատրաստված է գիտական պատշաճ մակարդակով: Ատենախոսությունը պատրաստված և կազմված է ատենախոսության ձևավորման պահանջներին համապատասխան: Ատենախոսության հիմնական դրույթներն արտացոլված են հեղինակի հրատարակած գիտական հոդվածներում, սեղմագրի բովանդակությունը համապատասխանում է ատենախոսության բովանդակությանը:

Ամալյա Գագիկի Սաֆարյանի «Հավաքների ազատության սահմանադրական հիմքերի իրացման արդի հարցադրումները» վերտառությամբ թեկնածուական ատենախոսության վերլուծությունը հիմք է տալիս եզրակացնելու, որ այն համապատասխանում է

«Հայաստանի Հանրապետությունում գիտական աստիճանների շնորհման կարգը և չափանիշները հաստատելու մասին» ՀՀ կառավարության 1997 թվականի օգոստոսի 8-ի N 327 որոշմամբ ատենախոսությանը ներկայացվող պահանջներին: Հեղինակը ցուցաբերել է գիտահետազոտական-վերլուծական զգալի ընդունակություններ, կատարել է բազմակողմանի հետազոտություն, ներկայացրել է պատշաճ մակարդակով գրված, տեսական և գործնական զգալի նշանակություն ունեցող աշխատանք, որի համար ատենախոսության հեղինակը կարող է արժանանալ ԺԲ.00.02-«Հանրային իրավունք (սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում)» մասնագիտությամբ իրավաբանական գիտությունների թեկնածուի գիտական հայցվող աստիճանի շնորհման:


**Պաշտոնական ընդդիմախոս, իրավաբանական գիտությունների թեկնածու, դոցենտ**

**Ս. ԲԱԴԱԼՅԱՆ**

23 սեպտեմբերի, 2024 թվական

Պաշտոնական ընդդիմախոս, իրավաբանական գիտությունների թեկնածու, դոցենտ Սայադ Բադալյանի ստորագրությունը հաստատում եմ:

**ԵՊՀ իրավագիտության ֆակուլտետի ղեկանի տեղակալ**



**Ա. ՊԵՏՐՈՍՅԱՆ**

24 սեպտեմբերի, 2024 թվական